

## Morning Regional Dogri News Bulletin, 27<sup>th</sup> June 2024

मार्निंग डोगरी न्यूज़ बुलेटिन, समे. 09-20 Hrs



### Headlines

- राष्ट्रपति द्रौपदी मुर्मू होर अज्ज संसद दे दौनें सदनें दे सांझे इजलास गी संबोधत करगंन।
- उपराज्यपाल मनोज सिन्हा होर कल जम्मू थमां श्री अमरनाथ यात्रिएं दे पैहले जत्थे गी रवाना करगंन।
- डोडा जिले दिएं उपरलिएं पहाड़िए च छिड़े दे टाकरे च त्रौनें आतंकवादिएं दा सफाया। जैश ए मोहम्मद आतंकी संगठन दे एह त्रवै आतंकवादी पाकिस्तान थमां आए दे हे।
- उपराज्यपाल मनोज सिन्हा होरें आखेआ जे जम्मू कश्मीर च बाहरले मुल्ख थमां औने आले सैलानिएं दी गिनतरी च 300 फीसद दा सलाना बाद्धा दर्ज कीता गेआ ऐ।
- आईसीसी टी-20 दा पैहला सैमीफाइनल दक्खन अफ्रीका नै अफगानिस्तान गी 9 विकटें कन्नै हराइयै जित्ती लैता। दुआ सैमीफाइनल अज्ज संला लै भारत ते इंग्लैंड बश्कार होग।



### President Joint Session

राष्ट्रपति द्रौपदी मुर्मू होर अज्ज संसद दे दौनें सदनें गी सांझे तौर पर संबोधत करगंन। राष्ट्रपति हुंदे अभिभाषण मगरा दौनें सदनें च धन्नबाद प्रस्ताह पेश कीता जाग, जेहदे पर सदस्य चर्चा च हिस्सा लैगन। 18मीं लोकसभा दा पैहला इजलास सोमवारें शुरू होआ हा ते राज्यसभा दा सत्र अज्जै थमां शुरू होग। कल ओम बिरला होर बी दूर्ई बारी लगातार लोकसभा अध्यक्ष दे तौर पर चुनेआ गेआ हा। बीजेपी दे वरिष्ठ सांसद होरें गी ध्वनिमत कन्नै चुनेआ गेआ। विपक्ष नै कांग्रेस दे सांसद के.सुरेश होरें गी अपना मेदवार बनाए दा हा। चुनां मगरा प्रधानमंत्री नरेन्द्र मोदी, विरोधी धड़े दे नेता राहुल गांधीते पार्लिमानी मामले दे मंत्री किरन रिजिजू होर बिरला होरें गी अध्यक्ष दे आसन तोड़ी लेइयै गे। अपने संबोधन च बिरला होरें आखेआ जे संसदी कदरें ते लोकतांत्रिक रिवायतें गी समृद्ध बनाना उंदी प्राथमिकता होग।

अध्यक्ष चुने जाने पर बिरला होरें गी मुबारकबाद दिंदे होई प्रधानमंत्री होरें आखेआ जे बिरला हुंदे दूई बारी चुने जाने पर इतिहास बनी गेआ ऐ। विपक्ष दे नेता राहुल गांधी होरें बिरला होरें गी मुबारकबाद दित्ती ते आखेआ जे सदन लोके दिएं आसें—तांगें दी नुमायंदगी करदा ऐ।



## LG-Amarnath Yatra

उपराज्यपाल मनोज सिन्हा होर कल बडलै भगवती नगर आले यात्री निवास थमां श्री अमरनाथ श्रद्धालुएं दा पैह्ला जत्था बालटाल ते चंदनवाड़ी लेई खाना करगंन। उपराज्यपाल होरें कल बडलै 4 बजे दे कोल काल प्रमुख शैहरदारें दी मजूदगी च यात्रा दे पैहले जत्थे गी खाना करगंन। यात्रा लेई सारे सुरक्षा बंदोबस्त कीते गेदे न ते सुरक्षा बलें, नीम फौजी बलें, पुलस ते होर दूई सुरक्षा अर्जेसिएं यात्रा सरबंधी अभ्यास बी कीता हा। इस सलाना यात्रा लेई केई सारे श्रद्धालु मुख्य दे बक्ख—बक्ख हिस्सें थमां इत्थें पुज्जना शुरू होई गेदे न। प्रशासन आस्सेआ सरस्वती धाम च यात्रिएं लेई मौके पर पंजीकरण करने दी सुविधा उपलब्ध करोआई गई ऐ ते रौहने बौहने दी बवस्था भगवती नगर आले यात्री निवास च उपलब्ध ऐ। यात्रिएं लेई जम्मू शैहर च 25 बक्ख—बक्ख थाहरें पर इंतजाम कीते गेदे न। जम्मू दे अतिरिक्त डिप्टी कमीशनर सुशील गुप्ता जेहड़े जम्मू च यात्रा लेई प्रभारी न, होरें गलाया जे जेहड़े बी यात्री इत्थें पैहले पुज्जगंन, उनेंगी इनें थाहरें पर ठैहराया जाग ते सलाना यात्रा पर जाने दे इक दिन पैहले उनेंगी यात्री निवास औन दित्ता जाग जित्थुआं ओह अपनी अगो दी यात्रा शुरू करगंन।



## LG-Yatra

उपराज्यपाल मनोज सिन्हा होरें कल श्री अमरनाथ जी दी यात्रा दे चंदनवाड़ी आले आधार शिविर दा दौरा लाया ते उत्थें श्रद्धालुएं लेई कीते गेदे प्रबंधें दा निरीक्षण कीता। उपराज्यपाल होरें बक्ख—बक्ख मैहकमें दे अफसरें ते सेवा उपलब्ध कराने आले कन्नै गल्लबात कीती ते उंदे आस्सेआ उपलब्ध कराई जा'रदिएं सेवाएं सुविधाएं दा मुआयना कीता, जिंदे च सुरक्षा बंदोबस्त, साफ सफाई, बिजली पानी, सेहत सुविधा, संपर्क ते संचार बवस्था ते होर दुइयां सेवां सुविधां जेड़ियां आधार कैप कोला लेइयै पवित्र गुफा तगर यात्रा दे पूरे रस्तेया उपलब्ध कराइयां जानियां न। मनोज सिन्हा होरें जम्मू कश्मीर प्रशासन, श्राईन बोर्ड, पुलस ते सुरक्षा बलें ते होर सरबंधत घड़ें आस्सेआ कीते गेदे प्रबंधें दे बारे च तफसीली च जानकारी हासल कीती।



## Doda Encounter

सुरक्षा बलें इक बड़्डी कामयाबी हासल करदे होई डोडा जिले दे गंदोह थाहर सिन्नु आले जंगली इलाके च जैश-ए-मोहम्मद आतंकवादी गुट कन्नै सरबंघत रखने आले त्रै विदेशी आतंकवादिएं गी मारी मकाया ऐ। सुरक्षाबलें उंदे कब्जे थमां खरी मती गिनतरी च असला, बरूद ते होर दुआ विस्फोटक बरामद कीता ऐ। एहदे च 2 अमरीकी एम-4 कारबाइंस बी शामिल न। एह सफलता छत्तरगल्ला ते कोटा टॉप च 4 ते 12 जून गी सुरक्षाबलें ते आतंकवादिएं बश्कार होए दे टाकरे मगरा हासल होई। इस टाकरे च 7 सुरक्षाकर्मी घायल होई गे हे। पर आतंकवादी चुत्थुआं नस्सने च कामयाब होई गे हे। पर अभियान गंदो दे सिन्नु जंगली इलाके च आतंकवादिएं दी मजूदगी बारे थ्होई दी टकोहदी जानकारी मगरा चलाया गेआ। सेना, पुलस ते एसओजी आस्सेआ जंगल दी घेराबंदी कीती गई ते इक ढोक च आतंकवादी दी गतिविधि गी दिक्खेआ। दौनें बश्कार टाकरा होआ। आतंकवादिएं एम4 कारबाइन, एके रैफल दा इस्तेमाल कीता ते सुरक्षाबलें पर ग्रनेड बी सुट्टे जेहदा सुरक्षाबलें आस्सेआ परता दित्ता गेआ ते टाकरा भखी पेआ। इस टाकरे च त्रै आतंकवादी मारे गे। इस टाकरे च इक पुलस कर्मी घायल होआ जिसी अस्पताल पजाया गेआ ते ओहदी हालत स्थिर दस्सी जा'रदी ऐ।



## Army Reasi

उत्तरी कमान प्रमुख लैफ्टिनेंट जनरल एम.वी. सुचेन्द्रा कुमार होरें रियासी जिले दा दौरा लाया ते खित्ते च सुरक्षा इंतजामें दा जायजा लैता। उंदे कन्नै इस मौके 16 कोर दे जीओसी लैफ्टिनेंट जनरल नवीन सचदेवा ते रोमियो फोर्स दे जीओसी होर बी मजूद हे। एह दौरा 9 जून गी इलाके च श्रद्धालुएं दी बस पर होए दे आतंकी हमले दी पछोकड़ै च लग्गा ऐ तां जे सुरक्षा स्थिति दा जायजा लैता जाई सकै। उत्तरी कमान प्रमुख, व्हाईट नाईट कोर ते रोमियो फोर्स दे जीओसी होरें रियासी च दौरा कीता। उनेंगी इस दरान मजूद सुरक्षा स्थिति बारे सुरक्षा बलें दी कारवाइएं बारे जानकारी दित्ती गई।



## CBI-NEET

नीट पेपर लीक मामले दी जांच आस्तै सीबीआई दी इक टीम झारखंड दे हजारीबाग स्थित ओयसिस स्कूल पुज्जी। सीबीआई दे अधिकारिएं पेपर लीक कन्नै जुड़े दे बक्ख-बक्ख पैह्लुएं पर प्रिंसिपल थमां पुच्छ-गिच्छ कीती। एहदे मगरा अग्गे दी जांच ते पुच्छ-पड़ताल आस्तै सीबीआई उनेंगी अपने कन्नै लेई गई। प्रिंसिपल नीट मतेयान आस्तै हजारीबाग दे स्कूलें च नीट मतेयान आस्तै तालमेल अधिकारी हे। सीबीआई दी टीम नै एसबीआई हजारीबाग दी शाखा दे अधिकारिएं थमां बी पुच्छ-पड़ताल कीती जित्थें प्रश्न पत्र रखे गेदे हे। बिहार दी आर्थिक अपराध इकाई ईओयू नै पैह्ले आखेआ हा जे पटना दे खेमनी चक प्ले स्कूल थमां आंशिक तौर पर फकोए दा प्रश्न पेपर जब्त कीता गेआ हा।

एह राष्ट्रीय सतह पर मतेयान लैने आली अजेंसी एनटीए थमां हासल प्रश्न पत्रें कन्नै मेल खंदा ऐ। इस्सै प्रश्न पेपर दी श्रृंखला हजारीबाग दे कल्लू चौक स्थित ओयसिस स्कूल आले मतेयान केन्द्र पर भेजी गई ही।



## LG-Tourism

उपराज्यपाल मनोज सिन्हा होरें कल आखेआ जे जम्मू कश्मीर च औने आले विदेशी सैलानिएं दी सलाना गिनतरी च 300 फीसद दा बाद्धा दर्ज कीता गेआ ऐ। जम्मू कश्मीर सैलसफा विभाग आस्सेआ झल झील दे कंडे स्थित शोरे कश्मीर अंतर्राष्ट्रीय कन्वेंशन सेंटर च आयोजित जम्मू कश्मीर सैलसफा विकास कॉनक्लेव गी संबोधत करदे होई उपराज्यपाल होरें दस्सेआ जे जम्मू कश्मीर सरकार नै इत्थें सैलसफा गी बढ़ावा देने लेई केई बड्डे ते महत्वपूर्ण हीले कीते न। उनें गलाया नमीं सैलसफा नीति राएं सैलसफा उद्योग गी बढ़ावा देने लेई बनकदा माहौल ते बेह्तरीन सुविधा उपलब्ध कराइयां गेदियां न। उपराज्यपाल होरें आखेआ जे घरेलू सैलानिएं दा बड़ी बद्ध गिनतरी च इत्थें पुज्जना, इत्थें सैलसफा दिएं संभावनाएं, उपलब्ध बेह्तरीन सुविधाएं दी दस्तेयाबी ते सुधरे दे हालात दा सबूत ऐ। कन्नै आखेआ जे एहदे नै सैलसफा उद्योग ते मकामी लोकें दे किट्टें रलियै कम्म करने ते रोजगार, बपार ते कारोबारी गतिविधिएं राएं आर्थिक विकास लेई बी केई नमें रस्ते खुल्ले न। उपराज्यपाल होरें आखेआ जे पिछले बरे जी-20 दी कार्ज समूह दी बैठक दा कश्मीर घाटी च रमानेदार ते कामयाब आयोजन जम्मू कश्मीर दे सैलसफा च यकदम उछाल औने दा इक बड्डा कारण बी ऐ जेहदे नै दुनिया गी पता लग्गा ते जम्मू कश्मीर च माहौल बिल्कुल ठीक ऐ ते एह सैलसफा लेई इक शानदार थाहर ऐ।



## Film-Tourism

श्रीनगर दे शोरे कश्मीर अंतर्राष्ट्रीय कन्वेंशन सेंटर च आयोजित जम्मू कश्मीर ट्यूरिसम कॉनक्लेव च सूचना विभाग दे निदेशक जतिन किशोर होरें जम्मू कश्मीर फिल्म सैलसफा दे बारे च तफसीली पेशकारी कीती। जम्मू कश्मीर सैलसफा विभाग आस्सेआ आयोजित इस कॉनक्लेव दा मकसद इस क्षेत्र च सैलसफा गी बढ़ावा देना ते इस क्षेत्र च नमिएं संभावनाएं गी उजागर करना ऐ। इस मौके जतिन किशोर होरें जम्मू कश्मीर दे दिलचस्प ते सगगोसार सांस्कृतिक तानेबाने ते मन परचाई लैने आले इक कोला बधियै इक शैन सनाहखड़े नजारे दी तस्वीर पेश करदे होई आखेआ जे एह सब किश फिल्म निर्माण लेई बनकदा ते माफक माहौल उपलब्ध करांदा ऐ। उनें आखेआ जे इत्थें फिल्म निर्माण गी बढ़ावा देने लेई जम्मू कश्मीर सरकार नै फिल्म निर्माताएं लेई केई रौ-रयायतां ते प्रोत्साहन आंदे दे न तां जे ओह फिल्में दी शूटिंग लेई बाहरले मुल्खें च जाने दे बजाए इत्थें औन ते अपने मुल्खे च गै फिल्में लेई बेह्तरीन माहौल दा लाह हासल करी सकन।

उनं आखेआ जे जम्मू कश्मीर फिल्म पॉलसी शुरू करने दे बाद अजें तोड़ी साढ़े त्रै सौ कोला बद्ध परमीशनां फिल्में दी शूटिंग लेई दित्तियां जाई चुकी दियां न। उनं आखेआ जे इस प्रक्रिया गी होर मता सखल्ला ते सुविधा जनक बनाने लेई इत्थें सिंगल विंडो सिस्टम शुरू कीता गेदा ऐ जेह्दे नै शूटिंग लेई परमिशन हासल करना मता सुविधाजनक होई गेदा ऐ।



## Chamliyal

सांबा जिले दे रामगढ़ सेक्टर च भारत पाकिस्तान अंतर्राष्ट्रीय बन्ने पर स्थित बाबा चमलेयाल हुंदी समाधि पर लगने आला सलाना मेला अज्ज शुरू होआ। इस बारे ताजा जानकारी देआ'रदे न साढ़े जिला संवाददाता सतपाल शर्मा.....बाईट



## India Semis

मर्दे दे आईसीसी टी-20 विश्व कप दा दूआ सैमीफाइनल मैच अज्ज संजा गुयाना च भारत ते इंग्लैंड बश्कार खेड्डेआ जाग। भारतीय समें मताबक मैच रातीं 8 बजे शुरू होग। भारतीय टीम दा एंट बरोबर भखे दा ऐ ते एह्दे हौसले पूरी चाल्ली बुलंद न की जे प्रतियोगिता च उन्नै अजें तोड़ी इक्क बी मैच हारे दा नेई ऐ। गुयाना च मौसम पिछले दऊं दिने दा बदलोखड़ा ऐ ते शामी लै तेज बरखा दे असार बरोबर बने दे न, जेह्दे कारण होई सकदा ऐ जे मैच घट्ट ओवरें दा जा नेई फही खेड्डेआ गै नेई जाई सकै। तोआई अज्ज बडलै त्रिनीदाद दे ब्रायन लारा स्टेडियम च खेड्डे गेदे इस प्रतियोगिता दे पैहले सैमीफाइनल मैच दक्खन अफ्रीका नै अफगानिस्तान गी 7 विकटें कन्नै हराई दित्ता। पैहले बल्लेबाजी करदे होई अफगानिस्तान दी टी 11 ओवर ते 5 गेंदें च शडे 56 रंज गै बनाई सकी। जेह्दे परते च दक्खन अफ्रीका नै 8 ओवरें ते 5 गेंदें च इक विकट दे नुक्सान पर 60 रंज बनाइयै मैच अपने नां करी लैता। फाइनल मकाबला दक्खन अफ्रीका ते अज्ज शामी दुआ सैमीफाइनल जित्तने आली टीम बश्कार होग।

